

广东通志

廣東通志卷二

甲子重刊

訓典二

乾隆元年

上諭總理事務王大臣向來廣西鹽引因商人無力承辦以致民間有淡食之苦于雍正元年經督臣孔毓珣題請官運官銷借動庫銀爲鹽本赴廣東納價配鹽分給各州縣照部定價值發賣行之二年已有贏餘遂將通省鹽價照部定之數每觔減去二釐發賣百姓稱便雍正五年又經孔毓珣奏稱粵西鹽觔自官運官銷以來已無鹽缺價貴之虞應請仍照原定部價一體銷售不必裁減二釐部議准行至今因之朕思食鹽乃小民日

用之需部價既多二釐則民間所費必不止於二釐廣西地瘠民貧道路遙遠應令鹽價平減以惠閭閻自乾隆元年爲始著照雍正元年原題每觔減去二釐銷售該督撫可嚴飭各州縣不許加增分毫務使小民均霑實惠倘有高價病民者查出嚴行叅處

乾隆元年

上諭總理事務王大臣廣東山海奧區貧民多以捕魚爲業各縣俱有額徵漁課爲數無多相沿已久後因歸善縣不肖知縣私取陋規加于額徵十數倍遂經撫臣定議加增魚稅一千餘兩作爲贏餘而海豐惠來潮陽三縣地方仿照加增海豐縣則增至四千餘兩惠來縣增

至五百兩潮陽縣增至七百餘兩朕思粵東山多田少小民生計艱辛故以捕魚爲養贍之計今他縣漁租皆仍舊額而歸善等四縣獨徵收加重恐漁民輸納維艱非國家愛養黎元之意著將四縣加增之數悉予豁免仍照原額徵收其捕魚小船尤不應在輸稅之內再查粵東有埠租一項亦民間自收之微利前經地方官通查歸公爲湊修圍基之費夫圍基旣動公項銀兩修築則埠租一項亦著一體免徵以免閭閻之煩擾該督撫轉飭有司實力奉行毋使奸胥地棍借端私取致窮民不得均霑實惠

乾隆元年

上諭總理事務王大臣朕聞廣東有屯糧羨餘一項原係衛所官弁徵收每正糧一石收穀三四石不等除正米撥支兵糧外餘穀悉係衛所官弁侵蝕入己嗣經督撫查出題報歸公畱備賑糶之用但屯田糧額本重於民田今以一石之糧徵收至三四石屯民其何以堪又聞各省軍田糧額較之民地亦重從前軍田畝數原多嗣後漸次清釐田主亦屢經更易而糧石仍輸舊額自屬苦累大學士等可寄信各督撫詳加確查將如何定額徵收並革除額外加徵之處密議請旨

乾隆三年

上諭據廣東督撫鄂彌達王暮奏稱崖州牧王錫感恩令

李壽阜俱於到任數月染瘴身故家口樞櫬貧難歸籍
請定四省邊瘴病故官員回籍拯恤之例此等人員奉
職邊遠不幸因而殞生深可憫惻自應酌量加恩但朕
意與其加恩拯恤於身後何如設法保全於生前向例
瘴地各缺原係揀選熟習水土之員調補則調補人員
必其本籍與兩粵道路相近水土始爲相宜未可漫無
分別概行調往也將來作何定例拯恤併變通之處著
大學士會同詳悉定議具奏欽此

乾隆三年

上諭每科主考差往各省彼地督撫有無餽送路費向無
定例今朕酌量道途之遠近分別路費之多寡雲南八

百兩貴州七百萬四川廣東廣西福建湖南六百兩江南江西浙江湖北陝西五百兩河南山東山西四百兩爾等可行知各督撫遵照此數不得以私意增減主考等亦不得於此數之外更有所受將此永著爲例欽此

乾隆五年

上諭東南沿海一帶如山東浙江福建廣東廣西江南等省俱設有戰船以爲海防之備今承平日久官弁漸覺疎忽朕聞船隻數目竟有報部之虛名而十分之中不無缺少二三甚至大修小修之時每因船數太多難以查核該防營弁及州縣官員通同作弊將所領帑銀侵蝕入己報修十隻其實不過七八隻而又塗飾顏色

以爲美觀仍不堅固且更有不肖官弁令子弟親屬載
販外省或賃與商人前往安南日本貿易取利者以朕
所聞如此雖未必各省皆然然亦難保必無其事可傳
諭該省督撫提鎮等嗣後嚴行稽查加意整頓務令諸
弊盡絕以重海防倘將來再有風聞經朕特遣大臣前
往查出則虛冒廢弛之咎惟於該管之大臣是問欽此

乾隆六年

上諭內閣朕聞廣東崖州及感恩陵水二縣今夏雨水短
少迨後雖經得雨而爲日已遲播種不能遍及撫臣王
安國雖飭州縣官發穀借糶以資接濟而彼地連年歉
收其極貧之民無力借糶者仍苦不能餬口深可軫念

著該督撫卽飭有司加意賑恤務令窮黎不致失所又聞瓊州雷州二府屬于本年八月十四五日風雨大作吹揭瓦屋其田禾室廬有無損傷之處亦著酌量辦理

乾隆七年

上諭內閣各省州縣考試童生乃士子進身之始文武雖有殊途各宜秉禮自愛以敦士風朕聞粵東俗尙澆漓每遇生童齊集考試之時或赴攤鋪短價強買什物或與市人扭結稟官稍不遂意卽恃衆囂喧挾制罷考地方有司視以爲常每多寬縱今聞得高州府石城縣本年五月間考試文武生童有武童李之萊赴考被蒙姓民人拾去馬箭一枝比時稟知縣令已諭典史查追給

還而諸生以知縣不能立刻拘責洩忿於本日上燈時
乘縣署月臺下失火遂有武生林翰芝武童林翰權及
李芬源等擁至宅門攫取衣服錢文而散現據該地方
官查究尙未結案又聞電白縣考試武童外場因馬道
擁擠喝逐閒人有武生扭役毆打之事又右翼鎮親赴
教場操演有武生不衣不冠雜入衆中擁攔馬道驅令
遠立遂毆打兵丁肆行詈罵似此身列宮牆不遵禮教
轉恃青衿以爲抗法橫行之具士習如此風俗何由而
淳此皆地方大小官員及學政教官平時不能化導之
所致用是特頒諭旨著該督撫學政等董率有司教官
嚴切訓諭務令士子等洗心滌慮痛改前非倘冥頑不

靈仍不率教卽按律懲治不稍寬貸如官員等有徇隱姑縱者一經查出定行分別處分

乾隆七年

上諭軍機大臣等廣東廣肇圍基向來原係民修相安無事後經鄂彌達奏請改爲官修百姓遂以爲無與已事一切委之於官歲歲多有衝決民旣置之不問官豈能曲爲隄防今辦理數年總未妥協仍不免疎虞將官員徒受叅處而百姓愈長刁頑爲籌久遠終非長策可寄信與慶復令其詳審本地情形若可仍改民修卽將所見具摺陳奏

乾隆十年

上諭國家設制科取士首重者在四書文蓋以六經精微盡于四子書設非讀書窮理篤志潛心而欲握管揮毫發先聖之義蘊不大相逕庭耶我

皇考有清真雅正之訓朕題貢院詩云言孔孟言大是難乃古今之通論非一人之臆說也近今士子或故爲艱深語或矜爲俳儷辭爭長角勝風檐鎖院中偶有得售彼此仿傚爲奪幟爭標良技不知文風日下文品益卑有關國家掄才鉅典非細故也夫古人論文以渾金璞玉不雕不琢爲比未有穿鑿支離可以傳世行遠者至於詩賦揆藻敷華雖不免組織渲染然亦必有真氣貫乎其中乃爲佳作今于四書文採掇辭華以示淹博不

啻于孔孟立言本意相去萬里矣先正具在罔識遵從
習俗難化職此之由嗣自今其令各省督學諸臣時時
訓飭鄉會考官加意區擇凡有乖于先輩大家理法者
擯棄勿錄則詭遇之習可息士風還淳朕有厚望焉特
諭

乾隆十年

諭三載賓興國家舉賢右文之大典必諸弊悉去然後可
以拔真才所謂稂莠不除則嘉禾不生其理顯然向來
察弊之法不得不嚴者正慎重科名厚待良士之道昨
歲朕親臨貢院遍觀堂所周覽號舍矮屋風檐備極辛
苦深可軫念比賦四詩命刻堂壁可以知朕心矣今歲

會試已展期三月以待春溫嗣後卽以爲例茲特豫降
明旨諭禮臣知貢舉俾得先期計議從容料理當嚴則
嚴當寬則寬于剔除弊端之中寓優卹士子之意知貢
舉者其善爲之特諭

乾隆十一年

上諭軍機大臣等準泰奏太平關徵收貨稅內有則例未
載比照徵輸者有因貨物貴重酌加細料者有因則例
稍重量從輕減者厯任相沿商民悅服若概爲改照舊
例均有未便請仍照現在之數徵收一摺經部按冊查
對其量增量減之處尙屬合宜惟比照徵收各條如珍
珠玉器等貨比照湖綢例徵收之處均屬未協議合該

撫準泰會同總督策楞另行酌議造冊具題等語該部所議是夫比例徵收原因例無正條酌量貨物貴賤以此較彼價值相等始可比照今珍珠玉器貴重等貨非湖綢可比準泰豈不知之乃如此比擬徵收輕重不倫或係準泰未經細心查察或係胥吏蒙混借此行私均未可定爾等可傳諭準泰令其畱心查辦

乾隆十一年

上諭內閣廣東瓊州府屬應徵牛薪等項稅銀四千二百餘兩據該督撫查奏此項稅銀內有無著銀一千七百餘兩實係畸零小戶難以照舊派徵等語朕思牛薪等項稅銀雖載在全書例應徵納今既查明此內有無著

銀兩若按額徵輸民力未免拮据著將廣東瓊州所屬應徵牛薪等稅內無著銀兩加恩永遠豁免俾邊海貧民不致有追呼之擾

乾隆十一年

上諭內閣據廣東巡撫準泰奏報廣州府之南海三水順德肇慶府屬之四會鶴山開平恩平南雄府屬之始興韶州府屬之曲江仁化英德乳源等縣因大雨水發有被衝田畝圍基房舍之處民間有傾壓淹斃者定例夏災止有借貸口糧籽種未及賑恤之條等語朕心深爲軫念著將實在乏食貧民給與一月口糧所有沙壓田畝倒塌房屋及淹斃人口令該撫查明俱著加恩分別

撫恤其被災稍輕應須借給口糧籽種者卽行借給秋後免息還倉俾被水民人均霑實惠無致失所

乾隆十一年

上諭內閣向來外省降調旗員遇有本應駐防缺出咨送應陞人員引見時將降調人員一併咨送列于應陞人員之後帶領引見如引見不用至第三次引見時將緣由聲明具奏但廣東福建四川甘肅等省距京遙遠屢次咨送未免長途拮据嗣後廣東福建四川甘肅等省降調人員著於第二次引見時該將軍都統副都統等卽將該員降調緣由并出考語聲明具奏不必至第三次以省跋涉之勞